



滄浪嚴先生吟卷之二

樵川

陳士元

賜谷

編次

進士

黃清老

子肅

校正

五言絕句

西陵望

西陵終日望不見有歸橈欲去猶回首寒江起暮潮

閨怨

昨夜中秋月含愁顧影頻空留可憐影不見可憐人

又

欲作遼陽夢愁多自不成
錯嫌烏白鳥半夜隔窗鳴

舟中示同志

見說春帆外康廬水石多
期君一把臂長嘯入煙蘿

塞下絕句

莫被封侯誤封侯似漢家
君看城下骨萬古一黃沙

七言絕句

送友人之楚州

黯黯離筵夕照收
江城羌笛起邊愁
念君此去三千里
何處關山是楚州

鬲故人見贈

湘江南去少人行
瘴雨蠻煙白草生
誰念梁園舊詞客
枕柳樹下獨聞鶯

羽林郎

貂帽狐裘塞北妝
黃鬚年少羽林郎
彎弓不怕天山雪
生縛名王入建章

閨中詞

良人西去擊狂胡
妾在閨中對影居
萬里長看天外月
一生空得夢中書

塞下曲 六首

孤城莽莽秋天外，
日無雲空自哀。
忽怪一時天，
黑合群胡雁向西來。

渺渺塵沙散橐駝，
風吹黃葉渡黃河。
羗人半醉葡萄熟，
塞馬初肥苜蓿多。

古戍秋生畫角哀，
思歸泣盡望鄉臺。
胡天日落寒風起，
但見黃沙萬里來。

一身遠客逐戎旌，
落日蕭條望古城。
漸近磧西無水草，
北風沙起橐駝驚。

玉關西去更無春，
滿眼蓬蒿起塞塵。
漢馬不歸青海月，
胡笳愁殺隴頭人。

天山一夜雪漫漫，
虜去營空戰血乾。
十萬征人回馬首，
天邊烽火報平安。

江上送客

留君夜飲北風寒，
且折梅花耐醉歡。
明日桐廬潮去遠，
孤帆天際若為看。

賴成之還自江西感舊有作

十年心事兩蹉跎，
南北東西別恨多。
今日樽前重把

手相看爭柰白頭何

聞笛

江上誰家吹笛聲
月明霜白不堪聽
孤舟萬里瀟湘
客一夜歸心滿洞庭

舟中指落星寺

日暮黃沙壓岸平
江心風浪暗冥冥
南康一望何由
到愁殺舟中指落星

答李友山山中留別

已恨青山臨渡口
相思回首隔夫君
更堪重到相思

處不見青山見白雲

秋日

西風催我轉胡床
坐落秋山午夢涼
蟬老樹深音響
別滿天風雨帶斜陽

新涼

小院新涼水竹通
鳴蟬聲斷晚來風
忽然坐睡
去不覺殘書落手中

臨池

乍涼池館雨初收
菱角蓮房共趁秋
獨恨碧波渾占

却更無剩水浴沙鷗

北風

夜來雨雪北風顛吹得波濤欲暗天世上如今少知
已煩君牢繫釣魚舡

燕 此篇或云三體作

巢破春雛半不存
嗚況空傍主人門
一生巧計輸黃
雀飲啄官倉長子孫

吳中送友歸豫章

川程極目渺空波
送爾歸舟柰別何
南國音書須早

寄江湖春雁已無多

臨川送周月舡入京

別時把酒已魂消
別後音書恐闕寥
一片離心寄春
水隨君舡入浙江潮

五言八句

別客

客髮風霜晚離亭
鼓角聞念君當此去
把袂不能分
衡霍連秋氣瀟湘合暮雲
愁心將落葉向晚共紛紛

送張季遠入京

手把一枝菊贈君千里行山川遙滿目何處是吳京
飲罷北風起蕭蕭胡雁聲東流倘未及見我望君情

訪益上人蘭若

獨尋青蓮宇行過白沙灘一逕入松雪數峰生暮寒
山僧喜客至林閣借人看吟罷拂衣去鐘聲雲外殘

從軍行二首

朔風嘶馬動遙想雁門秋負劍辭鄉邑彎弓赴國讐
黃榆連白草河隴去悠悠報主男兒事焉論萬戶侯

又

翩翩雙白馬結束向幽燕借問誰家子邯鄲俠少年
彎弓隨漢月拂劍倚胡天說與單于道今秋莫近邊

出塞行

將軍救朔邊都護上祁連六郡飛傳檄三河聚控弦
連營當太白吹角動胡天何日匈奴滅中原得晏然

關山月

今夜關山月偏能照馬鞍盧龍征戍客圓缺幾回看
遙想金閨裡應悲玉露寒黃沙三萬里何處是長安

蜀女怨

幾時離月峽五見紫蘭凋塞雁隨魂斷江花逐泪飄
沙頭南北客京口去來潮日日無消息空登萬里橋

尋甯山人所居

幽人以道隱結茅岩之東余亦避世客逢君於此中
鳥因留食至泉為煉丹紅向晚下山去月高秋色空

江樓夜月懷故山友人陳聘君吳樗鄉

昨夜江樓月思君好斷腸猿聲相應發山色更青蒼
楚塞來書遠閩關隔夢長今朝看愁髮為爾半成霜

江上有懷上官長史

懷君長不樂立馬大江邊塞鴈來無際驚沙度颯然
客心懸日夜書札斷雲天莫作青山老空為人所憐

聞鴈

遠客驚秋雁高樓復異鄉聲兼邊哨苦影落楚雲長
此夜頭堪白他山葉又黃年年洞庭浪飄泊更無行

送上官偉長

歲晚長愁緒嗟君更遠行兵戈今日泪江海故人情
此別幾時見寒猿一夜鳴致君相許在回首壯心驚

有懷閩風山人

把酒忽惆悵君今吳楚間孤雲隨馬首風雨隔河關
心事竟安在此行殊未還空將百年意泣向寶刀環

避亂途中

回首兵戈地遺黎見幾人他鄉空白髮故國又青春
多難堪長客偷生愧此身本無匡濟畧嘆息謾傷神
將往豫章留別張少尹父子

西江飛鳥外極目渺離愁同侶時催發征人不可留
江湖雙泪眼天地一孤舟揮棹從茲別空傷旅鬢秋
懷南昌舊游

昨在南昌府清遊不可窮杯行江色裡棹進月明中
樓笛吹晴雪菱歌漾晚風坐來懷舊迹萬里一飄蓬

寄山中同志

我有三足鹿放之在碧山別來幾千日昨夢忽來還
松色入天盡岩花落地閑憑君一問信沿月上潺湲

望西山

西山橫翠新中隱石仙真喚取玉麈尾揖茲丹霞人
雲從石洞出月落滄江頻予亦將高卧藤蘿掛葛巾
秋夜臨汝館懷友人陳聘君賴竹莊

秋聲動梧竹。月色滿庭蕪。此夕懷良友。天涯各一隅。
飛飛群過雁。切切未栖烏。安得從君去。扁舟駕五湖。

樟樹鎮醉後題

吾憐樟樹好。取醉欲無還。酒壓鵝兒色。詞歌雉子斑。
朱樓當碧水。紅日下青山。興罷揚鞭去。蒼々煙霧間。

張奕見訪逆旅

歲晚傷為旅。君來適慰情。郊扉寒少色。江渚夜多聲。
報國怜他日。為儒愧此生。那言離合際。更觸壯心驚。

豫章城

愛此城高處。回鞭醉每醒。江花兩岸白。煙樹一行青。
雲學山舒態。天隨水賦形。吾多徐孺子。獨向此沉冥。

江行

暝色蒹葭外。蒼茫旅眺情。殘雲和雁斷。新月帶潮生。
天到水中盡。舟隨樹杪行。離家今幾宿。厭聽棹歌聲。

舟中苦熱

舟行何太熱。岸上莽塵沙。閃々浪頻過。昏昏日又斜。
年衰愁作客。秋近苦思家。蝗旱三千里。江淮兒女嗟。

江上泊舟

天際長愁客沙邊舊驛亭風低江浦雁雲暗夜舡燈
窮老嗟身拙狂歌畏酒醒此生何定著江漢一浮萍
逢戴式之往南方

此老相逢日中原正用兵黃塵空北望白首更南征
今古悲秋意江湖惜別情幾時群盜滅匹馬會神京

塞下

鞍馬連年出關河萬里餘將軍思報國壯士恥還家
大漠春無草天山雪作花誰憐李都尉白首沒胡沙

吳江春望

客有東南別憑高正憶家青春江上草湖日岸頭沙
去鳥無邊盡歸帆幾處斜音微不可問惆悵結瑤華

閑居寄友

蕭條遺世心江上坐來深擁褐閑窺沼思山欲借琴
有幡煙際寺無葉水邊林不見同袍友憑誰伴苦吟
遇周子陵自行在還言石屏消息

不見石屏老相思問客舡長沙聞近別行在定虛傳
兵革來書斷江湖望眼穿他時同話此把臂喜應顛
喜友人相訪擬寄蘇州作

朝朝竹林院閉戶讀殘書
几閣晨風入江郊寒露餘
故人步屨至清坐每躊躇
輟卷還留興漱泉同飯蔬

有感六首

誤喜殘胡滅那知患更長
黃雲新戰路白骨舊沙場
巴蜀連年哭江淮幾郡瘡
襄陽根本地回首一悲傷

二

哀痛天災日絲綸罪已深
王師曾北伐胡馬尚南侵
謀國知誰計和親豈聖心
願聞修實德聽納諫臣箴

三

聞道單于使年來入國頻
聖朝思息戰異域請和親
今日唐虞際群公社稷臣
不妨盟墨詐須戒覆車新

四

災異時時見群情恐懼中
脩禳今日急反側向來同
社稷堪多難安危係數公
殘生江海去老作一漁翁

五

陛下春秋盛謙卑每責躬
得無勞聖慮猶未定儲宮
付託闕神器乾坤在至公
早聞宣詔冊歡喜萬方同

六

傳聞降北將猶未悔狂圖忍召豺狼入甘先矢石驅
聖朝何負汝天意必亡胡試看山東寇如今更有無

三衢邂逅周月舡論心數日臨分賦此二

首

同是江湖客居然歲月多心期看白髮歸夢付滄波
子去見家遠吾衰柰別何幾時江上月載酒定相過

又

戎馬相逢日那知復此間客愁詩莫遣世事酒相關
江上孤舟在天隅兩鬢斑更將憂國泪滿袖送君還

秋日廬陵送杜子野攝鍾陵糾掾

暫見還分手誰能不黯然去帆蘆葉浦別酒菊花天
他日思良會空囊檢贈篇鍾陵有過雁莫忘尺書傳

七言八句

臨川逢鄭遐之雲夢

天涯十載無窮恨老泪燈前語罷垂明發又爲千里
別相思應盡一生期洞庭波浪帆開晚雲夢兼葭鳥
去逢世亂音書到何日關河一望不勝悲

再送賴成之出都

天際晴霞欲變春，高樓分手泪沾巾。
荆吳渺渺孤舟遠，江海悠悠白髮新。
萬事蹉跎堪更問，十年離別亦何頻。
江村幾處梅花發，明日相思是旅人。

將至潯陽途中寄諸從昆弟

渺渺孤帆去幾程，悠悠天際望湓城。
一身避亂辭鄉國，千里相思隔弟兄。
猿叫匡廬寒暮色，雁過彭蠡帶秋聲。
江湖此去多飄泊，腸斷風塵遠別情。

紫霞樓夜飲

西樓孤絕倚天青，我愛明河對戶橫。
露滿碧梧風屢

起，煙消綠嶠月初生。
仙人共酌丹霞酒，逸侶同吹白玉笙。
不向此時窮咲傲，更從何處豁高情。

客中別表叔吳季高

悠悠遠別半生悲，白日相逢又語離。
海內風塵驚不定，天邊消息到何時。
洞庭旅雁春歸盡，瓜步寒潮夜落遲。
惆悵孤舟從此去，江湖未敢定前期。

和上官偉長蕪城晚眺

平蕪古堞暮蕭條，歸思憑高黯未消。
京口寒煙鴉外滅，歷陽秋色雁邊遙。
晴江水落長疑雨，暗浦風生欲

上潮惆悵此時頻極目江南江北路迢迢

寄郭招甫時在潯陽

夢向三江買釣舡掛帆西去白雲邊
函開曉色香爐見門落寒聲瀑布懸
百年酒興陶彭澤四海詩名孟浩然
何日真尋塵外跡焚香酌茗話先賢

登滕王閣

高閣憑空浩蕩開當時遺跡幾荒苔
煙含晚市悠悠見沙帶澄潭渺渺回
此日登臨分壯氣百年淪落憶雄材
可憐萬古神交意日暮荒涼一嘆哀

早春寄潛齋王史君

昏々醉睡慵朝起日日柴門待煖開
春至任從花鳥咲客來須仗酒尊陪
移舟動覺依江柳策杖時能訪早梅
忽憶使君聯騎去此時乘興且啣杯

送崔九過丹陽郡上荆門省親

江國歸心一鴈牽河橋分手數盃傳
千厓萬壑秋聲裡匹馬孤帆落照邊
牛渚寒波翻極浦荆門晚樹合遙天
他時莫枉瑤華問南北相思各渺然

舟中寄漢陽故人

浦口停留待信風邊城落日亂流通梧桐院落秋聲
裡橘柚人家晚哭中棹歌幾處驚寒切砧響千村入
耳同日日愁心西北望漢陽楓樹落無窮

夜泊

夜聞估客送將歸葭葉蕭條月色微萬里江湖何處
極孤舟鴻鴈自相依盃拋黃菊乾賒酒城掩清砧罷
搗衣不柰此時心斷絕長沙南去故人稀

送吳儀甫之合肥謁杜師

十年劍氣欲凌雲况復才華迥不群投筆幾回思出

塞賦詩此日去從軍沙場青草時差緩淝水紅旗捷
屢聞玉帳元戎桑梓舊行看幙府策奇勛

楚江晚思

旅思遙遙倦向南誰家煙火起晴嵐孤城歸鳥連寒
角極浦斜陽帶遠帆楓葉自能悲楚客竹枝何用怨
江潭今朝欲寫風波恨千里書成手自緘

古詩

送趙立道赴闈仍試春官即事感興因成

五十韻

嗣聖中天日遺氓憶漢時一王新盛禮萬國賀重熙
官爵沾寰宇光明冠本支窮冬辭老母吉日赴京師
祖席明斜照寒江結暮漸停杯愁把袂立馬語臨岐
草動春前色梅繁雪後枝湖山饒逸興士友重遊嬉
菱唱工迷客荷舟穩放維土風珍縞帶吳饌熟蓴絲
塔寺開金碧樓臺漾淼淼雲連句踐國江動伍員祠
閭闔春朝早觚稜霽景遲柳迎仙仗軟花旗御樓歌
首宿來宛馬櫻桃薦寢帷周家千歲曆漢殿萬年卮
駐蹕山川遠繫弓歲月移天俄憂杞國日再仰咸池

弓劍群臣泪園陵故國悲乾坤開帝統雨露豁宸私
蜂虿何為爾豺狼欲問誰箭流元帥幟城立叛營旗
國体存於邱皇猷務遠綏且從鷹一飽自待虎雙疲
復說京西亂愁連蜀道危倉皇分隊伍指點護藩籬
狙詐終勞馭遊魂不足羈幾年腥戰血今日痛瘡痍
宗社神靈在邦家德澤遺會聞淝水捷可復雁門踦
草詔詞頭切蒲輪禮意卑賢良多選拔社稷在扶持
舉動新群目經綸佇一變長沙何遽往鄭北竟堪疑
莫以朝廷重翻令盜竊窺稍懲鷹隼擊庶使鳳凰儀

新膽方無倦輿圖正入披王孫思報國天府待忠詞
世道多為忌波流幸勿隨從容陳古昔感慨論邊陲
仕進雖云始平生見在茲青氈今可復綵服更相宜
漂泊微軀老蹉跎困翻垂黻材元自逸正論竟焉裨
誤賞騷人作深慚國士知叫閭時已晚鳴劍志空馳
鬱鬱驅流俗悠悠嘆亂離羊裘終隱去漁釣復何之
出處從今隔飛騰不可追濟時須俊傑願覩中興期

庚寅紀亂

承平盜賊起喪亂降自天荼毒恣兩道兵戈浩相纏

此邦禍最酷賤子忍具言朝廷討亂初誰任主將權
輜重道間來隱隱何闐闐殿前盡貔虎所向當無堅
組練照川明戈戟耀日鮮父老當時言此賊不容吞
軍興法律在進退非得專奈何忽捨去屯壘隨之遷
留兵不五百當賊逾數千英英胡將來策馬獨奮先
出入突且擊勢絕飄風旋殺賊不知數屍骸相疊穿
誰謂散復來其徒柰實繁須臾塞城郭沓水迷妖氛
將軍怒一呼誓死報國恩拔劍復入陣鼓聲俄不聞
哀哉失壯士白日為之昏嗟彼城中人欲生何由緣

連頸受屠戮赤族罹禍寃妻妾悉驅虜道路號相牽
或有小失意性命無由全言語方出口腰領已不連
婉婉閨中女未嘗窺戶邊白刃斤之去不許暫稽延
回頭顧父母父母安敢憐所掠靡子遺囊擔無虛肩
衣冠困奴隸怒罵仍笞鞭又有脫鋒刃多化為魚龜
途窮勢復迫忽若忘重淵倉卒所傳誤投身空棄捐
嬰兒或在抱粉黛猶儼然沙磧腥入腸啣啄集烏鳶
嗚呼彼蒼天念此胡罪愆比者因亂定南歸經舊廛
豈徒人民非莫辯陌與阡所見但荆棘狐狸對我蹲

坡陀流血地靡靡生寒煙城頭遇老翁行泪與余論
云賊破城時賊初攻南門大軍血戰父家得扶我奔
所免有萬計皆我胡君恩不然盡魚肉遺黎何有焉
語罷復嗚咽余亦涕泗漣軍旅苦轉輸飢餓仍存臻
瘡痍苦未復千里惟空村白骨不知誰無人為招魂
四郊實多此仁者宜惻然近喜大告捷所俘悉已還
兇渠戮廟社黨類歸之田當知釜中魚貸爾喘息懸
胡為迭恃險高壘猶山巔蠻獠本異性土風來有年
力屈勢暫伏乞降非惡悛脅從固罔治群醜豈盡原

反復恐難料安危仗諸賢此師不再舉乘時須勉旃
國家刑罰在廟筭必不偏感時鬚髮白憂國空拳拳

贈呂仲祥

雪中誦招隱高卧閑琴尊忽有呂夫子清晨扣我門
夫子忠烈後家聲四海聞神交三十載方此挹清芬
吾道識宗主文章詔討論期我名山遊招我出塵紛
伊余抱病久局促滯中園平生海嶽交零落今誰存
今日對夫子使我開心魂忽覺此身去萬里如空雲
已見赤城霞疑聞天姥嶺世道久崩迫誰將元化分

濛濛六合間莽莽塵沙昏所以賢達士甘將麋鹿羣
終欲從夫子超然凌紫氛松間兩白鶴爾實聞斯言

登豫章城感懷

憂來不自得登城望高天寒雲四面起朔氣下長川
脫劍且却座君知心惘然柰何平生志鬱抑江湖間
凜凜秋風來茫茫落日晩長憂生白髮沉想忘朝飯
向來經濟士本自碌碌人蕭曹刀筆吏樊灌市井臣
徒步取勲業漢道爲光新我今何爲者飄飄去鄉國
狂歌豫章城醉臥風江碧但取英雄笑終慙個儻生

名當以德載事恥因人成獨酌還獨酌哀歌還寂寞
安得凌風翰爲君拂寥邈

夢中作

予客廬陵日夢至一大府主人自稱
劉荊州與予觴燕各賦詩爲樂覺而
彷彿其一二因續成之

少小尚竒節無意縛珪組遠遊江海間登高屢懷古
前朝英雄事約略皆可觀將軍策單馬談笑有荆楚
高視蔑袁曹氣已蓋寰宇天未豁壯圖人空坐崩沮

丈夫生一世成敗固有主要非儻儼人未死名已腐
夫何千載後亦忝趨太府主人愛敬客開宴臨長浦
高論極興亡歷覽窮川渚殷勤芳草贈窈窕邯鄲舞
愧無登樓作一旦濫推許懷哉揮此觴別路如風雨

劉荊州答

皇漢失中德四海橫雕戈驚塵暗九有豺虎臨長河
流入蒲川谷積屍亂如麻關洛既蕩析楚襄空嗟峨
謬當牧守寄無以救時訛竟貽百代誚家世隨蹉跎
安知千載下夫子感慨多人生固有志成敗飄風過

且復登城隅，逍遙望山河。日暮襄漢碧，鳧鴨浮輕波。
何以慰我心，玄態間黃駝。清觴宜城酒，二八邯鄲歌。
願言馮懷抱，聊用寬吾家。勿言此歡久，樂罷歸無何。
廬陵客館雨霽登樓言懷寄友

終日坐汾渙，邈然無少欣。登樓一周覽，始見萬山群。
微雨洗殘暑，青天捲浮雲。襟懷兩廓落，朗若見夫君。
見君君何在，顧影還獨吟。吏非金門遊，隱異滄洲調。
江明秋月白，山空夜猿嘯。徒事百卷文，未返一竿釣。
留滯豈勝愁，非君誰與謀。水寒終赴海，鴈遠暫宿秋。

舉世不可語，猶當傲巢由。贈君三尺劍，永駕五湖舟。

送嚴次山

四年棲嶺表，三歲客海東。人生貴安適，奔走成何功。
去年喜歸來，山花春蒙茸。弟姪各捧觴，一咲生華風。
南山多紫芝，北山多白薇。雲空汗漫臺，月午生涼輝。
俯仰僅一歲，脂車復征西。豈以丈夫志，萬里猶庭帟。
豈以名山川，待公親品題。故園松桂林，一一含貞姿。
何時賦歸來，毋令久凝思。

豫章留別諸公

登樓眺海日沙島聽江猿何意豫章國還着孤蓬根
經過徐孺宅出入洪喬門昔者秋葉落今見荷葉繁
頗耽山水趣正愜朋從溫窮秋催客去孤帆若雲奔
追攀感數子灑襟餘泪痕既傷歲月晚復戀煙霞樽
歡樂無定序聚散同朝昏丈夫志四海別離何足論

遊臨江慧力寺

舟中望古剎川上移琴樽隱隱林閣見迢迢鐘梵聞
列岫不離席驚濤常在門風帆與沙鳥汎汎隨朝昏
天高一幡掛室靜衆香焚煙起多近郭鴉歸無遠村

松際尚微雪經年來暮猿賞惟靜者契法對高僧論
安得息塵駕永懷瞻獨園明朝別此去惆悵滿松雲

山居即事

稍欣入林深已覺煩慮屏霜果垂秋山歸禽度嵐嶺
紛紛葉易積漠漠雲欲盛澗底寂無人松蘿窅然暝
惟聞山鳥啼月上柴門靜終歲寡持醪延歡聊煮茗
群書北窗下帙亂誰能整

遊仙
六首

秋澗夜瑟瑟月露明團團寒衣步澗月忽見雙飛鸞

上有騰空仙天風飄珮環清歌映巖谷粲若玉煉顏
愿言緣雲去隨君向仙關燕食長不老何用思人間
二
憶讀玲瓏篇來往虛皇閣空見白芙蓉秋風幾凋落
昨逢紫陽君共有丹臺約下視塵埃中冠纓縛損攬
世事行若此悠悠復何託

三

五老出東南崔嵬相間隔清晨登絕頂處處仙人跡
朱霞散九光巖谷好顏色回首空澄湖黃濤正喧擊

石上弦素琴神歡心自清仙童三四人忽來左右聽
嘹嘹誦金章勸我飡瑤瓊贈我一玉塵邀我凌雲行
舍琴與之去恍惚在蓬瀛

四

朝別簡寂觀夜行石逕溪溪光照厓綠月色正相宜
石上三道士頎然好丰姿或弄金光草或把珊瑚枝
憑風招素手賜我一玉卮嘆我事遠遊蕭颯朱顏衰
長林孤月落羽蓋何歲徙垂垂乘之去棄我忽若遺
明發闕無覩但有青髯啼

五

翩翩南來雲如飛百隻鶴我行忽見之眇然意欣樂
五峰何峻秀靈草生根萼願棄此雲去去鍊黃金藥
千載倘歸來不復見城郭

六

瀑布好明月上有石梁橫矯首望東海正見蟾蜍生
揚輝天漢間下照蓬丘城桂實幾凋落姮娥空聞名
咄哉玉斧子不如白兔精靈藥不服食執柯獨何成
迢迢綵雲外誰吹白玉笙竦身一長聽了若出寰瀛

我友遠言邁

朔風卷秋樹白日寒無光是時鴻鴈來四野何蒼茫
我友遠言邁使我結中腸如何攜手歡一旦成異鄉
行旅有期程遊子多悲傷置酒欲高歌淚來沾我裳
四座慘相顧征馬亦徬徨未知會面日且復盡茲觴

悠悠我行邁

悠悠我行邁邈在天一方道路無終極時節異炎涼
路逢故里親揮泣問我鄉妻子離別久不知今存亡
中原多白骨城邑聚豺狼遠去無僮僕思還絕餼糧

寄語家中人遠行良可傷

朝日臨高臺

朝日臨高臺
瞻彼芳樹間
上有共棲鳥
和鳴何闐闐
爾乃慕儔侶
我胡獨不然
良友在萬里
邈然河與山
聚會豈不思
歲月倏已殫
未必無他人
要非心所歡

昔遊東海上

昔遊東海上
道遇青董君
授我度世訣
中皆鳥篆文
讀之了不解
再拜問微言
舉首忽無見
茫々空白雲

秋風入我戶

秋風入我戶
翻々動床帷
咄嗒中夜起
柰何我心悲
四海豈不大
傷哉無已知

過逍遙山

來過許仙宅
復窺洪崖井
地逐靈勝高
輿接煙霞永
伊余坐昏墊
久欲還林嶺
明發囊丹砂
歸歟煉顏景

聞鴈二首

淒離聽不足
咿嗚斷還續
江人何似情
估客舟中宿
夜深砂磧寒
月冷洞庭寬
寂寞相依影
悲風動堯翰

又

江南底好處塞北今衰草何恨旅情遙月映蘆花老
琵琶倚蓬窗孀婦別洞房十載江湖泪一夕盡淋浪

古懊儂歌 六首

五兩轉須更相望奈何許寄語黃帽郎舡頭慢搖櫓

二

君子如白日願得垂末光妾身如螢火安能久照郎

三

郎去無見期妾死那瞑目郎歸如認妾墳應有相思木

四

舡在下江口逆風不得上結束作男兒與郎牽百丈

五

朝亦出門啼暮亦出門啼蛛網掛風裡遙思無定時

六

懊惱復懊惱懊惱無奈何請郎且少住聽妾懊惱歌

滄浪嚴先生吟卷卷之二

滄浪嚴先生吟卷卷之三

樵川 陳士元 暘谷 編次

進士 黃清老 子肅 校正

楚詞

憫時命

憫時命之不當兮去重華之日遠懷貞懋之操行兮
遭此世之澆忍志浩蕩以耿介兮思低回而蹇產衆
日進而蔽壅兮何靈脩之為怨因時俗之佺儂兮背
矩矱而不可化獨好脩以增姱兮宜反謂余以多詐

惟天地之不可正兮指黃泉以為期欲余屈心以從
俗兮雖九死其猶不忍為執太原之擾兮蹈焦原之
峻世沈淖而莫予知兮吾愈曉々而自信昔伯陽之
逢紛兮時亦去其違々繫周公之不復夢兮曷疑尼
父之惋傷陰與陽其轉轄兮天與地其回薄八柱將
撓兮四極安託嗟余生之多艱兮哀衆命之將落願
披志以抽憑兮思自近而不可得獨抑悒而無誰語
兮怊茫洋而焉極涕滂溢而瀕溶兮向高穹而嘆息
吾將遜俗以潔居兮從巢父于箕山采三秀以咽蒼

栢兮聊以終吾之永年哀山谷之多風兮霰雪冥冥
而不見天豺狼縱目以相嗥兮虎豹群而食人信自
適而無所兮蹇淹留而懍恍目正正而外浮兮精專
專而獨往寒太清以為珮兮盪灝氣以為桂芳颯還
而並御兮豈獨椒桂與江離厭此世之多囂兮時遠
眺而去之揭太乙之長竿兮建招搖之飛旗天吳為
余奔走兮龍伯為余指麾折鄧林以為策兮眇八合
而驅馳左裾拂乎崑崙兮右袂掩乎月窟訪混沌之
所止兮趨清冥而歷荒忽撫盤古之頂兮挽天皇之

臂叙予心而陳詞兮曷為乎鴻荒之不再世吾將揭
北斗而量九州兮均人命之所與定日月之所舍兮
使長照臨此下土又恐群靈之好讒兮俾上帝之憑
怒不照余之精誠兮吾將安懇臨天路而徬徨魂廷
廷兮失度亂曰遭余車以來歸兮曾何足以舒憂羗靈
脩之不吾祐兮於今之人其何尤懷余情而終古兮
聊與化而逍遙

操

雲山操為吳子才賦

山龍擬兮白雲雲冥冥兮高山若有人兮居其間超
逍遙兮盤桓芸壚兮茵楠羅橘橘由兮為堂塗予室兮
楓香擘葛藟兮為帷藟藟雜兮佩帟穹岫兮玄厓瀑
流兮相飀皎積雪兮奔雷攢林杳其蔽日兮掛飛猱
之清哀雲中之君兮白鹿山靈續兮下空谷風蕭蕭
兮灌木雲山兮幽幽羗躑躅兮夷猶惆悵兮予懷非
夫君兮誰思投余簳兮太息從夫君兮歸來

塗山操

天蒼蒼河水黃河流泱泱大野茫茫伯鯨治水九年

無功四海赤子化為魚龍鯨殛死堯震怒乃命禹平
水土水土平禹功成魍魎奔走人安寧平地栽桑麻
山頭種蕎麥赤驥騰橙黃牛上輓諸侯會同三千國
嗟爾防風後至矣為悠悠塗山今昔所悲

吟

行子吟

行子在江海飄飄無固踪有如芒碭野朔風捲飛蓬
朔風無休期飛蓬日千里散落天地間寧有復歸理
胡雁西北來一叫三徘徊何時別沙漠昨夜宿陽臺

同群一相失羽翮常低摧人物有殊性柰何罹此哀
昨夜客遊初結交重豪邁高冠湛盧劍志若輕四海
白首悔前圖蹉跎天一隅寒冬劍門道失路空踟躕
深林聚豺虎絕壁號猩鼯雪深車軸折征馬驚啼呼
何當返故處冷黍居田廬泪下不能云腸轉如輓轡

還山吟留別城南諸公

日暮望南山悵然歸思發如何山中客屢看城頭月
城頭月照文蘿秋石磴潺湲瀉碧流巖嶺久別應惆
悵澗鳥相呼亦共愁城南故人與我好令我忘却歸

山道昨夜西窗夢到家忽驚千嶂之花老朝來舟子
從辭君回首空江語尚聞別後莫嗟難見面相思只
均垂領頭雲

孺子臺吟

去年醉與東湖別欲上衡湘泛秋月君家留我却遭
迴悵望還成阻脩闕西山縹緲翠屏開復憶滕王倒
玉杯經過始識洪崖井調笑重登孺子臺臺前呼酒
折荷花水淨煙明散落霞舉杯失笑君何在望斷行
雲空咄嗟故人別後還愁緒此都不是余智處興來

目送海邊鴻歸心掛在閩溪樹路逢估客有情人因
得題詩一寄君大鵬正展圖南翼空有相思隔海雲
引

思歸引

海上之草綠芊芊洞門一閉今幾年仙驥去時留紫
鞭掛壁見之心惘然欲歸即歸亦由我不待功成何
不可堯舜不能屈由巢自餘王侯何足交武陵春水
綠堪染就中亦有棄麻郊近聞秦人笑相語待我東
溪種碧莖

謠

夢遊廬山謠示同志

昨夜月落西窗陰倦推石枕凭素琴身居紅塵不自覺夢入廬山深復深廬山深處在何許五老仙人邀我語眉如秀雪顏苑花酌酒相酣坐箕踞明河九派倒西來石梁嶢絕古道開五公握手向我咲下見劫火揚塵灰獨騎一鹿窮縈迴曾然醉踏青錦苔松風號嘈何清哀湍飛瀑捲萬壑雷忽然驚起迷所向四座已失黃崔嵬披衣徬徨還太息我與世途何所屑

亂世茫茫飛蠓蟻袖中別有金膏訣須君之行當何時共向丹崖踏松雪

歌

錢塘潮歌送吳子才赴禮部

海潮之來自古昔天下詭觀稱錢塘東南士氣實在此勢與造化為低昂觀其映日始一線何處群鷺紛然翔漸聞鼓聲震原野疑是三軍置陣行銀城天際忽過眼捲蕩厚地何倉皇餘波已去灑月窟怒氣猶自吹扶桑百川倒流浩呼洶天吳河伯神皆竦海上

長人出水驚巨鰲辟易三山動廣陵之濤安可比吳
客雄誇徒為爾請君看此凭江樓載酒無勞棹小舟
湖上百花春蕩目笙歌聒我非清遊洪濤萬里壯可
吞筆底颯々洪濤奔頤持忠憤懇明主一第於君何
足論錢塘日邊雲氣多君之行兮莫蹉跎教人臨岐
柰別何贈君錢塘海潮歌

送戴式之歸天台歌

吾聞天台華頂連石橋石橋巉絕橫煙霄下有滄溟
萬折之洪濤上有赤城千丈之霞標峰懸磴斷杳莫

測中有石屏古仙客吟窺混沌愁天公醉飲扶葉泣
龍伯適來何事遊人間飄飄八極尋名山三花樹下
一相見咲我蕭颯風沙顏手持玉杯酌我酒付我新
詩五百首共結天邊汗漫遊重論方外雲霞友海內
詩名今數誰群賢翕沓爭相推胸襟浩蕩氣蕭爽豁
如洞庭笠澤月寒空萬里雲開時人生聚散何超忽
愁折瑤華贈君別君騎白鹿歸仙山我亦扁舟向吳
越明日憑高一望君江花滿眼愁氛氲天長地闊不
可見空有相思寄海雲

雷斧歌

窮厓之上層峰之巔神光夜半光燭天山僧夢裡忽
驚起有物墮地聲填然峰頭巨石似開劈鬼物散走
如飈旋山僧曉見不敢取有客識之為雷斧持歸摩
挲色蒼古匣中徃々出雲氣函外時々起風雨吾聞
陰陽之氣相搏為雷霆變化翕歔常杳冥非若羊羝
考擊之為聲不知此斧何從形乃是比干之心朱雲
之舌一片忠憤氣蟠鬱天地間千載長不滅造化為
爐巧鎔結嗟哉指佞之草不復生群奸睚眦紛縱橫

大弓寶玉爭竊取豈懼鬼責并天刑我欲乘雲朝帝
所大叫天闕排九虎乞將此斧借小臣叩頭問天天
更許

行

劍歌行贈吳會卿

劍歌行借君劍為君舞自古英雄重結交樽酒相逢
氣相許愛君倜儻不可羈與君一見心無疑踈眉大
額長七尺神采照耀仍虬髯雄詞落紙走山嶽霹靂
繞壁蛟龍隨如何十載困羈旅此心獨未時人知去

年從君殺彊虜舉鞭直解揚州圍論功不及驃騎幟
失路羞逐邊城兒歸來宝刀掛空壁白光夜々驚虹
霓椎牛醞酒且高會酣歌擊筑焉能悲百年快意當
若此迂儒拳局徒尔為我亦摧藏江海客重氣輕生
然唯諾

放歌行

進賢之冠兮高乎岌危山玄之佩兮長乎陸離苟非
其道兮曷如蕙帶而荷衣堯舜邈其不逢兮我之心
其孰得而知寧輕世肆志兮採商山之芝與其突梯

滑稽有口如飴據高位而自若鈞厚祿而無疑則余
有蹈東海而死耳誠非吾之所忍為

相逢行贈馮熙之

馮夫子神仙中人乃如此幾載長懷玉樹枝向來曾
見蛟龍字志合神疑盃酒間誰知豁盡平生事與君
高會日揮金擊劍談玄復弄琴看君自是青雲器何
事常懸滄海心我今與君真莫逆世上悠悠誰復識
百年飄忽或須臾萬里青雲一飛翼且將耕釣任吾
身君亦牀頭有周易馮夫子我欲勸君飲君當為我

歌眼前萬事莫可理紛紛黃葉掃更多長風吹天送
落日秋江日夜揚洪波只今留君不盡醉別後相思
知柰何

送吳會卿再往淮南

故人身披紫綺裘腰佩寶玦騎胡騶英風俠氣橫四
海辭我遠向淮南遊淮南桂樹應猶在八公舉手遙
相待明月高懸五兩頭隨君千里過淮流十年鞍馬
邊城道又見邊城見春草春草萋々路入秦長安北
望空愁人荆楚奇材多劍客感慨相逢思報國男兒

事業早致身青鬃須防霜雪迫我向人間又拂衣白
雲相伴掩巖扉調琴鼓罷清商曲愁見孤鴻天際飛

促刺行

促刺復促刺男兒蹭蹬真可惜三年走南復走北歲
暮歸來空四壁鄰翁為我長嘆息人生四十未為老
我已白頭色枯槁海內伶俜獨一身裘馬摧藏愁欲
倒今日飲君數盃酒座間頗覺顏色好忽憶當年快
意時與君咲傲長相期大杯倒甕作牛飲脫巾袒跣
惟嫌遲即今多病筋力弱壯心雖存興寂寞君不見

昨夜誰為烈士歌聽罷仰空泪零落

古劍行

我有三尺劍懸膽光陸離刺鐘不錚切玉如泥水斷
蛟龍陸剗犀三軍白首終一揮惜哉掛壁無所施使
之補履不如錐吾將抱憤愬玉帝手持此劍上天飛

北伐行

王師北伐何倉卒六郡丁男亳州骨空見朝陵奉使
回群盜翻來舊京闕襄陽兵馬天下雄尚書兄弟才
傑同偏裨入救嗟已晚萬國此恨何時終

四方行

四方群盜苦未平况聞中原多甲兵百年讐耻幸已
雪何意復失東西京嗚呼機事難適至成敗君看豈
天意戰骨連營漫不歸空流烈士中宵泪

上留田

天地一何長久上留田人老一去無歸上留田松栢
一何纍纍上留田勸君酒尊金罍上留田願君大家
蠶桑上留田有絲織作衲襠上留田無為多憂重煩
傷上留田

估客樂

荊州人來販穀下江易上江難
舡頭打鼓波漫漫長帆挽上五兩竿

詞

滿江紅送廖叔仁赴闈

日近觚稜秋漸滿蓬萊雙闥正錢塘江上潮頭如雪
把酒送君天上去瓊琚玉珮鸞鴻列丈夫兒富貴等
浮雲者名節○天下事吾能說今老矣空凝絕對西
風慷慨唾壺歌缺不灑世間兒女泪難堪親友中年

別問相思他日鏡中看蕭々髮

沁園春為董叔宏賦溪莊

問訊溪莊景如之何吾為平章自月湖不見江山零
落驪塘去後煙月淒涼有老生如梅峰者健筆縱橫
為發揚還添得石屏詩句一段風光○主人雅興猶
猗每攜客臨流泛羽觴想歸來松菊重煩管領同盟
鷗鷺未許相忘我道其間如斯人物只合盛之白玉
堂須還把扁舟借我散髮滄浪

滄浪逸詩

五言絕句

西山

西山青縹緲深處有丹砂
說道神仙客邀余戲紫霞
送友歸山效應物體

空齋

寒燈照疎竹栖禽時復驚
默坐空齋夜寂寂道心生

五言八句

歲暮得表叔吳景仙書因寄

遊吳還適越慷慨莫徒然
烽火關河隔兵戈宇宙連
書來山雪外人在海雲邊
借問遼東鶴歸來定幾年

登天皇山作

我來陟高頂俯瞰臨長川
陰厓隱落日疊嶂鳴飛泉
獨立一世外所思千古前
回看鳥沒處茫茫生白煙
游紫芝巖

羽客逍遙地花源世未尋
我來窺異迹高步越飛岑
石帶藤蘿古泉鳴澗壑深
紫芝未可采空寄白雲心

七言絕句 二首

萬里長江歲暮天冰堅可渡不須舡雪堂老子迎君
咲化鶴歸來又百年

梅花樹々攪離心寒重馳裘雪片深詩思飛來驢子
上小山叢桂伴君吟

四言

平寇上史君主潛齋

治平改元有盜于建昔犯我鄙狼蹂豕踐於休吾侯
維民之憂爰整我軍式遏虔劉侯勵將士無諱聽我
進退勇怯死生福禍侯出府庫啗勛賞餼前無堅敵

後無捷策乃有奇士據鞍請行袒裼入陣賊莫能嬰
亦有賢僚爭先跋涉屢摧賊鋒月奏三捷侯曰嘻哉
盜本王臣殪而殲旃傷天地仁赤子弄兵如魚遊釜
投戈歸田新汝生路孰謂反覆給我行人既弛我備
薄奄我軍我軍少却醜類鳴張環數百里奔播倉皇
侯曰嗟哉其又可怒馳赤白囊亟請淮旅淮旅未來
貼危如燬淮旅既來稚耆失喜侯謂淮將次舍良苦
体士秣馬我有清酤淮將曰吁剪此朝食不介而馳
直擣其穴群醜來聚亘野彌山淮旅整暇徐誘之前

弓不虛發矢不妄激發數步內應弦而踣或戈其喉
或及其脛若鳥獲力鞭乳臭嬰黨類周章途殫命窄
魚驚鳥散影不反迹淮旅拗怒萬眾介髮髻搜林刮莽
遠討窮追淮旅拗怒火烈具舉涕澤焦厓窟穴無所
自相蹈藉十殺八九喪魄亡精食不知口原膏野赤
谷臭川腥燐火不焰殤鬼殘形乃求元兇已縊巖阻
執彼餘魁入而振旅其魁伊何緇服髡首一郡縱觀
萬夫歡走炮烙剔腐以儆叛者前後獻俘復以百數
蕩滌汙垢宥貸脅從收霜捲電和氣融融侯饗淮將

加邊折俎庖騎酒車飲均衆伍何以贈之筐篚熒煌
戰功曰多告成于王嗟我婦子若翁若嫗安逸怡愉
匪侯曷保侯曰此捷諸將之功雖有諸將實侯指踪
讐在藩籬疾居心腹急緩安危若手反復匪侯勤請
蔓實難圖謂予不信徃有覆車君子作歌以頌侯績
誰其采詩願備簡冊

書滄浪先生吟卷後

滄浪嚴先生集世久失傳堅蚤
歲於詩人玉屑中讀其詩評而
心竒之後見武陽志略併其邑人
黃公紹所為滄浪集敘益歎其
精識博辯斬二自信蓋所謂不以
千里畏人者真曠世之士哉顧以

未及見其集為歎間者憲伯胡公
重器出所藏先生吟卷一快則
詩評具在而五七言古近體各
為公將謀之梓人用傳廣遠不鄙
謂堅俾填數譜手卷末顧堅堂知
言者哉夫文章并時高下宋自北
鼎南遷國執不競甚矣迨乎乾溥

之間積久道洽日趣彊盛一時尤楊
范陸諸君子家築駉壇人標赤幟
鳴盛之作駉二乎幾還東京之舊
開禧而後境土日蹙政厖日滋於
是觀詩之變亦與時俱極揚沙走
石以為奇叫罵叱咤以為豪而宇宙
閒幾無詩矣先生二當其時迺能

獸自奮廷力斬凌駕盛唐以闡步
漢魏境上視元和以還諸公殆有不
輕折輦行之意自餘賈島姚合而
下因其所不屑也昔之號知詩者宋
有先生元有劉湏沅會孟然湏溪
雖工於評擬至其自占筆則犁然
當人心者未可多見如先生華實

相副論述裁製工力兩到卷中塞
下從軍諸篇襍之盛唐家數殆未
易別其淄澠也於戲斯豈非所謂曠
世之士哉憲伯公持憲閣臺翊正履
古風懷雅尚其傳是編也具三美焉
表前脩厚也風後學羨也廣公器
仁也堅不佞敢填此于卷末

正德丁丑孟秋十日後學子長汀李

堅書



甲申十一月十三日兩日誦畢

約園識



